



ხაშურის მუნიციპალიტეტის საკრებულო

განკარგულება N180



2013 წლის 24 დეკემბერი


ქალაქი ხაშური

ხაშურის მუნიციპალიტეტის საზოგადოებრივი ჯანმრთელობის 2014 წლის მუნიციპალური პროგრამის დამტკიცების შესახებ

„ადგილობრივი თვითმმართველობის შესახებ“ საქართველოს ორგანული კანონის მე-16 მუხლის მე-2 პუნქტის „ქ“ ქვეპუნქტისა და 42-ე მუხლის მე-3 პუნქტის „ბ“ ქვეპუნქტის შესაბამისად

1. დამტკიცდეს „ხაშურის მუნიციპალიტეტის საზოგადოებრივი ჯანმრთელობის 2014 წლის მუნიციპალური პროგრამა (თან ერთვის).
2. განკარგულება გაეგზავნოს ხაშურის მუნიციპალიტეტის გამგეობას.
3. განკარგულება ძალაში შედის 2014 წლის 1 იანვრიდან.
4. განკარგულება შეიძლება გასაჩივრდეს დაინტერესებული პირის მიერ გაცნობიდან ერთი თვის ვადაში ხაშურის რაიონულ სასამართლოში (მისამართი: ქ.ხაშური, მერაბ კოსტავას ქ. #15).

საკრებულოს თავმჯდომარე



დავით ლომიძე

**ხაშურის მუნიციპალიტეტის საზოგადოებრივი ჯანმრთელობის  
2014 წლის მუნიციპალური პროგრამა**

**მუხლი 1. ზოგადი დებულებები**

ხაშურის მუნიციპალიტეტის საზოგადოებრივი ჯანმრთელობის 2014 წლის მუნიციპალური პროგრამა შემუშავებულია „ადგილობრივი თვითმმართველობის შესახებ“ საქართველოს ორგანული კანონის მე-16 და 22-ე მუხლების, „საზოგადოებრივი ჯანმრთელობის შესახებ“ საქართველოს კანონის 36-ე მუხლის საფუძველზე და შესაბამისად. მისი მიზანია მუნიციპალიტეტის ტერიტორიაზე მოსახლეობის ჯანმრთელობისათვის უსაფრთხო გარემოს შექმნისა და ცხოვრების ჯანსაღი წესის დამკვიდრების ხელშეწყობა, მოსახლეობის ინფორმირება.

**მუხლი 2. სანიტარული და ჰიგიენური ნორმების დაცვის ზედამხედველობა**

1. მუნიციპალიტეტში მოქმედ საგანმანათლებლო, სააღმზრდელო და საგანმანათლებლო-სააღმზრდელო დაწესებულებებში (დანართები #1; 2) გეგმაზომიერად განხორციელდეს ღონისძიებები სანიტარული და ჰიგიენური ნორმების დაცვის მდგომარეობის შემოწმების მიზნით; ქმედითი კონტროლი დაწესდეს გამოვლენილი ნაკლოვანებების დროულ აღმოფხვრაზე.
2. საგანმანათლებლო, სააღმზრდელო და საგანმანათლებლო-სააღმზრდელო დაწესებულებებში ხელი შეეწყოს პრევენციული ღონისძიებების განხორციელებას.
3. მუნიციპალიტეტის საზოგადოებრივი დანიშნულების ობიექტებში (მათ შორის უმწეოთა უფასო სასადილოში) ზედამხედველობა დაწესდეს სანიტარულ-ჰიგიენური ნორმების დაცვის მდგომარეობაზე.

**მუხლი 3. პრევენციული და ეპიდემიოლოგიური კონტროლის ღონისძიებები**

1. ეპიდსაშიშროებისას მუნიციპალიტეტის ტერიტორიაზე გატარდეს პრევენციული და ეპიდემიოლოგიური ღონისძიებები.
2. გატარდეს მუნიციპალიტეტის ტერიტორიაზე პირველადი ეპიდკვლევების ხელშეწყობის ღონისძიებები.
3. გატარდეს დაავადებათა საწინააღმდეგო ღონისძიებები იმ ცხოველების მიმართ, რომლებიც საფრთხეს უქმნიან საზოგადოების ჯანმრთელობას (მათ შორის მაწანწალა ძაღლების შეგროვება, გამრავლების რეგულაცია თანამედროვე ჰუმანური მეთოდების გამოყენებით, საჭიროების შემთხვევაში - ევთანაზია).
4. დაავადებათა პრევენციის მიზნით მუნიციპალიტეტის შესაბამის ობიექტებში ორგანიზება გაუკეთდეს დერატიზაციის, დეზინსექციისა და დეზინფექციის ღონისძიებებს ( დანართ # 3).
5. უზრუნველყოფილი იქნეს პროფილაქტიკური აცრების ეროვნული კალენდრით განსაზღვრული იმუნოპროფილაქტიკისათვის მოწოდებული მასალების დადგენილი პროცედურების მიხედვით მიღება, შენახვა და განაწილება.

**მუხლი 4. მოსახლეობის ჯანმრთელობისათვის უსაფრთხო გარემოს შექმნა**

1. სპეციალური გეგმის მიხედვით, სეზონურად, ორგანიზება გაუკეთდეს მუნიციპალიტეტის დასახლებულ პუნქტებში ქუჩების, მოედნების, სკვერების, სასაფლაოთა მიმდებარე ტერიტორიების სანიტარული მდგომარეობის მასობრივ დათვალიერებას.
2. სისტემატური კონტროლი დაწესდეს მუნიციპალიტეტის დასახლებული პუნქტების ნაგვისსაყრელებისა და ნაგვის შესაგროვებელი კონტეინერების სანიტარულ ნორმებთან შესაბამისობაზე. საჭიროების შემთხვევაში ორგანიზება გაუკეთდეს დერატიზაციის, დეზინსექციისა და დეზინფექციის სამუშაოებს.
3. შესაბამისი უწყებებიდან პერიოდულად გამოთხოვილი იქნეს დასახლებული პუნქტების მიხედვით მოსახლეობისათვის მიწოდებული სასმელი წყლის ხარისხის გამოკვლევის შედეგები და მიეცეს მას საჭირო რეაგირება.
4. გარემოს დაცვის სფეროში კომპეტენტური ორგანოების მონაწილეობით შესწავლილ იქნეს მუნიციპალიტეტის ტერიტორიაზე ნახმარი და ჩამდინარე წყლებით მდინარეების დაბინძურების მდგომარეობა და მომზადდეს წინადადებები საკითხის რადიკალურად გადასჭრელად.

#### მუხლი 5. მოსახლეობის ცხოვრების ჯანსაღი წესის დამკვიდრების ხელშეწყობა

1. სპეციალური გეგმის შესაბამისად, მუნიციპალიტეტის მასშტაბით, ჩატარდეს სპორტულ-გამაჯანსაღებელი ღონისძიებები. მასში ყველა ასაკისა და ჯგუფის მოსახლეობის ფართოდ მონაწილეობის მიზნით დაწესდეს წამახალისებელი პრიზები და ჯილდოები.
2. თამბაქოს, ალკოჰოლიზმის, ნარკომანიის, ტუბერკულოზის, შიდსის პროფილაქტიკის მიზნით, საცხოვრებელი ან/და სწავლების ადგილების მიხედვით, ჩატარდეს ახალგაზრდობის სანგანათლების ღონისძიებები (ლექციების, საუბრების ჩატარება, თემატური „მრგვალი მაგიდების“ მოწყობა, საგაზეთო სტატიების გამოქვეყნება; ამ საკითხებზე თვალსაჩინოების საშუალებებისა და სპეციალური ლიტერატურის (ბროშურები) გავრცელება).

#### მუხლი 6. პროგრამის ბიუჯეტი

1. პროგრამა ფინანსდება მუნიციპალიტეტის 2014 წლის ადგილობრივი ბიუჯეტიდან - მუნიციპალური პროგრამებისათვის გამოყოფილი ასიგნებების ფარგლებში.
2. პროგრამის დაფინანსების სავარაუდო მოცულობა 140 000 ლარს შეადგენს.

#### მუხლი 7. პროგრამის განხორციელების მექანიზმი

1. პროგრამას (გარდა მე-3 მუხლის მე-3 და მე-4 პუნქტებისა და მე-5 მუხლის პირველი პუნქტისა) ახორციელებს არასამეწარმეო (არაკომერციული) იურიდიული პირი „ხაშურის მუნიციპალიტეტის საზოგადოებრივი ჯანმრთელობის ცენტრი“ - მუნიციპალიტეტის 2014 წლის ადგილობრივი ბიუჯეტიდან გამოყოფილი სუბსიდიის (სავარაუდო მოცულობა - 85 867 ლარი) ხარჯზე.
2. პროგრამის მე-3 მუხლის მე-3 პუნქტით გათვალისწინებული ღონისძიებას ახორციელებს არასამეწარმეო (არაკომერციული) იურიდიული პირი „სავანე“ -

მუნიციპალიტეტის 2014 წლის ადგილობრივი ბიუჯეტიდან გამოყოფილი სუბსიდიის (სავარაუდო მოცულობა 50 000 ლარი) ხარჯზე, ხოლო პროგრამის მე-3 მუხლის მე-4 პუნქტით გათვალისწინებული ღონისძიება (სავარაუდო მოცულობა 4133 ლარი) ხორციელდება „სახელმწიფო შესყიდვების შესახებ“ საქართველოს კანონით განსაზღვრული წესით.

3. პროგრამის მე-5 მუხლის პირველი პუნქტით გათვალისწინებულ ღონისძიებებს ახორციელებს მუნიციპალიტეტის გამგეობის განათლების, კულტურის, სპორტისა და ახალგაზრდულ საქმეთა სამსახური 2014 წლის ადგილობრივი ბიუჯეტიდან სამსახურისათვის გამოყოფილ ასიგნებათა ფარგლებში.
4. პროგრამის მონიტორინგს (გარდა მე-3 მუხლის მე-3 პუნქტისა და მე-5 მუხლის პირველი პუნქტისა) ახორციელება მუნიციპალიტეტის გამგეობის ჯანმრთელობისა და სოციალური დაცვის სამსახური.
5. პროგრამის მე-3 მუხლის მე-3 პუნქტის მონიტორინგს ახორციელებს მუნიციპალიტეტის გამგეობის ინფრასტრუქტურის განვითარებისა და ტერიტორიის კეთილმოწყობის სამსახური.
6. ამ მუხლის პირველი, მე-2 და მე-3 პუნქტებით განსაზღვრული სუბიექტები ვადებულნი არიან დაუყოვნებლივ შეიმუშაონ პროგრამის შესაბამისი მუხლებით მათზე დაკისრებული ღონისძიებების განხორციელების კონკრეტული კალენდარული გეგმა-გრაფიკები და ყოველი კვარტლის ბოლოს წარუდგინონ ანგარიში მონიტორინგის განმახორციელებელ სამსახურებს მისი შესრულებისა და მიღწეული შედეგების შესახებ (განათლების, კულტურის, სპორტისა და ახალგაზრდულ საქმეთა სამსახური კალენდარულ გეგმა-გრაფიკსა და კვარტალურ ანგარიშს წარუდგენს კურატორ გამგებლის მოადგილეს).